

CICKOANBADIEGU

BULICINA FASO

Taanyenma - Findima - Teginma

GUVENEMA MASOAGINDO

**BAALO KOANBALA TAANLI
JAGA DOAGIDIMA**

(PP-G/TRANS N°023-2024)

Rimaliba Jan Emanuweli WEDARAWOGO

Li binli 2024 cilele o dana 10 Wagadugu pó

Baalo Koanbala Taanli den kali Wagadugu
nani ban maani ki tiedi maama dana lele kuli,
alaalibu daali, li binli 2024 cilele o dana 10,
ki cili leeri 9 yogunu ki ban gbeni leeri 13 leni miniti 12.
Kapitenni Ibarayimi TARAWORE, yua n tie ti Diema
Yudanciamo leni a Koanbala Taanli Liigiyua n den gobidi
laa taanli.

A Koanbala Taanli den noanli li daali mayula nni
ki taa a jaga, ki puni i laabaali,
ki dini bi niba a bala li tuonli po, ki puni u sanu
bi niba n gedi dietoama nni ti Diema yeli po.

I. A JAGA

I.1. Bulicina Faso Yudanciamo Badidiegu

A koanbala taanli taa **jagalie (2)**.

Li jagikpiali cilini ti diema nni yaa tuonsoancagili n baa yaa tuuni bi niba gagidima leni bi bandima po (ANSI), ki waani li tuona li boginma.

Laa jagili nunlema tie ki kaani yaa tuonsoancagili ke li tuonli ba yaa tie ki yaa gobidi mi diema yanjaga ki tuugi leni mi bandima Bulicina Faso nni. Laa tuonsoancagili baa todi a yanjaga leni a tuona taanma lan fidi ki ŋanbi ti gaanilindima ki go todi bonla boncianla n kua a masina nni.

Laa jagili taama baa todi ti Diema bali gobidima leni mi bandima kalima lan todi li bonla kuli n dagini ke a tuona n go yaa cuoni tontoni. Li go baa todi a masina n yaa bandi ki gagidi li bonla ke ti tuonsoantiadi mo n yaa taa ki tuuni li fuuli.

Li jagilieli wangi i jaandi maalima tuonsoanjaacianli Bulicina Faso nni sanbiciama fuuli boginli, ku tuona leni kun tuuni maama.

Laa jagili tie yaali ke bi guani diidi li ñoamabonli n°2018-079/PRES/GC, yaali ke bi den taa li binli 2018 ciyia o dana 3 ke li wangi i jaandi maalima tuonsoanjaacianli Bulicina Faso nni sanbiciama fuuli boginli, ku tuona leni kun tuuni maama.

Laa jagili nunlepanma n tie ne :

- i ligi tuona leni mi gobidima tuonsoandiegu n lebidi ki tua i ligi kubili tuonsoandiegu;
- ki kaani bi tuonsoanba gobidima tuonsoandiegu ;
- ki kaani a jaga yankpaagili leni a tuonboginkaana tuonsoanjaali;
- ki tugini i jaandi maalima tuonsoanjaali leni a koana gobidima leni a tila dianma tuonsoandieciangu;
- ki kaani tuonsoankaanilie lan yaa tie ki tuuni ki todi li tuonsoanjaali yudaano;

- mi Maalicianma Yudanciamo bali waagima n ña bina muu ki tua bina taa (3).

Laa jagili taama baa todi mi Maalima Yudanciandi fuuli Bulicina Faso nni n pugini a caga kalima paalu ki go fidi ki soani o tuona.

I.2. YAA KOANBADIEGU N DIIDI TI DIEMA LOAGU, I LIGI LENI A TUONBOGINKAANA

A koanbala taanli taa **jagiyenli** yaali n puni u sanu ban yaa gaani a bancana yaa tuona n tuuni yaa koanbadiegu n die i laabaali, ku maasuagu leni yanluadi goada tuona kani.

Yanluadi goada tuona ti diema Bulicina Faso nni bàà a yantiapaana ki pugini ki tuugi leni tuonsanbila nani yaa kaani n gaani bi niba cangu nani ti candiedi, i duankaani, ki gedi mi fuodima a dojaabila nni, yaa diena nni ke bi pà ki duandi, yaa dieciana n bogini leni ti tiadi ki pugini leni yanluadi goada tuona boginli yogunuba po.

Li doagidi ki waani ke li ñoamabonli n°2017-0377/PRES/PM/MCAT/MINEFID ban yaali li binli 2017 cimuu o dana 22 ke li wangi ke bi puni u sanu ban yaa gaani a bancana yaa tuona n tuuni laa koanbadiegu kani tin ye yaa dana nne pia yaa kaani ke li poadi. Laa poadima tie ke baa taani yaa tuona yaa kani ke bi baa fidi ki gaa a bancana mi tuonsoanbanma tuona kani leni ku maasuagu yaa tuona kani, ki pugini faaji jeliti tuona kani, ti tuonsoantiadi tagima leni ku maasuagu tuonsoandiedi leni mi tagima tuonsoandiedi kani.

Laa jagili tie yaali ke bi guani ki diidi tin bi tàà yaali tanpoli po ke li baa todi a bancana biinu n tandi ki tuugi leni ban yuandi ki taani yaa tuona leni yaa tuonsoanba ke bi yuandi ki taani ba nani yanluadi goada tuona, ku maasuagu leni mi tagima tuona.

Laa jagili taama baa todi ban taani laa bancana kuli yaa koanbadiegu n die i laabaali, ku maasuagu leni yanluadi goada tuona kani ki go todi Baalo ligikpaku n pili ki pugini.

I.3. YAA KOANBADIEGU N DIE TI BUUDI LENI O NISAALO N PIA YAA SANBILA TUONA, KI TUUGI LENI A TUONSOANJAANA

A koanbala taanli diidi **yaa balimaama n bogini** ki tie bi niba leni ku diegu balimaama ti diema Bulicina Faso nni.

Laa balimaama jagili taama tie ban guani ki diidi balimaama n°AN VII. 0013/FP/PRES ban den taa yaama li binli 1989 piiga n ciyendo o dana 16 ke li wangi bi niba leni ku diegu balimaama ti diema Bulicina Faso nni n bogini maama leni laa balimaama njoadima.

Laa balimaama jagili taama baa todi ti diema Bulicina Faso niba n baa yaaba n baa yaa nua li balimaama sanbila ki go pandi bi niba leni ku diegu balimaama tili ke lan njoadi u taayienu sanbila ti diema nni ki tuugi li njanunli nni mabilikaama tianma.

Bi niba leni ku diegu balimaama tili n pia yaa lebidipanma nne:

- "Satu" balimaama yeli lebidima ke li ji tie " bi niba leni ku diegu balimaama tili";
- u sanu puni ki diani a maamaatila a masina nni ki go tagini leni a masina sanbila ki diani o nilo madima tuona;
- ki taa li balimaama cuonu yaa jaba n taagi leni yaba bi yaa puoba n taagi leni yaba leni yaa tuona n tuugi leni laa sanbili nni kuli po;
- o caano bi nilamo kan fidi ki baa li buoli nni yaa tili n waani ke o tie ti diema Bulicina Faso yua wan njiigi yaa daali yaa pua n tie Bulicina Faso yua;
- ki tua Bulicina Faso yua bi ki bandi o nilo yaa tie Bulicina Faso yua tie njan yaa pia yaa tili wangi ke a tie Bulicina Faso yua;

- ki fidi ki tieni ku maasuagu ñiigili bi mi jaanma ñiigili lan yaa tie ke li ñua bi niba leni ku diegu balimaama tili sanbila.

A koanbala taanli puni u sanu ban soagini laa balimaama jagili depiteenba taancianli kani.

I.4. YAA KOANBADIEGU N DIIDI BU KPAABU LENI LI YANWUBILI TUONA

A koanbala taanli taa **jagiyenli** ki tuo ban guani ki diidi yaa tuonsoandiegu n die ti kpaandi kubili leni li jeeguoli ti diema nni (SONASESI) tuona guadiidima.

Laa jagili tie ban guani ki diidi li ñoamabonli n°2023-0669/PRES-TANS/PM/MARAH/MEFP/MEDICAPME ban den taa yaali li binli 2023 ciluoba o dana 6 ke laa tili puni u sanu yaa tuonsoandiegu n die ti kpaandi kubili leni li jeeguoli ti diema nni tuona soanma.

Laa jagili taama baa todi yaa tuonsoandiegu n die ti kpaandi kubili leni li jeeguoli n soani o tuona nani lan dagidi maama.

I. 5.YAA KOANBADIEGU N DIIDI MI TAGIMA TUONSOANDIEDI FINDIMA, U KPENDU TUONA LENI U NUU TUONSOANBANMA

A koanbala taanli taa **jagiyenli** ke li lebidi li ñoamabonli n°94-233/PRES/MICM ban den taa yaali li binli 1994 ciluoba o dana 13 ke li wangi yaa tuonsoandiegu n die ti kpaandi kubili leni ti li jeeguoli (SONASESI) kaanma leni yaa ñoamabonli n lebidi lan tie li ñoamabonli n°96-427/PRES/PM/AGRI-RA ban den taa yaali li binli 1996 piiga n cilie o dana 13.

Yaa lebidipanma n kali laa jagili nni n tie ne:

- ti kpaandi ñanma fuuli ke li ji baa yaa tie ki sieni ki jiini ki dagini ki dunga, ki yaa diidi yaa tuonsoanba n ko ti kpaandi, SONASESI n yaa tendi ti kpaandi tontoni Baalo tuonsoandiedi nni leni yaa tuonsoanjaana n tuuni todiyaba

sanbila nni, ki kaani yaaba n baa yaa gaani leni yaaba n baa yaa kuadi ti kpaandi. Laa sanbila nni, desiyon nni kuli bi baa màà ti kpaandi buabuana ki go baa bu kpaabu sanbila ki tuugi leni i muuli ;

- ki tandi ki gedinì SONASESI kpaandi tin kaa ye naankani;
- ki pugini SONASESI tuona cenli ligi, o kpaandi bilikaani leni ti kpaandi baama leni ti kubima;
- ki tiginì bi tuonsoanba ti kpaandi kubili po / ti kpaandi kubili nani yaaba n bogindi ti kpaandi baama leni ti kubili , yaaba n baa yaa diidi ti kpaandi jiema yaa kan cuani jalibu ti diema daamu nni leni niinpo daamu nni.

Laa jagili taama baa todi yaa tuonsoandiegu n die ti kpaandi kubili leni li jeeguoli ti diema nni tuonli tila n guani ki baa nunpanga ki go guani ki diidi o tuona cenli ki fidi cuo ki dagini ti kpaandi daaga.

I.6. YAA KOANBADIEGU N DIIDI LI DIEMAALI, KI TINGA TILA BOGINLI LENI U YEKAANU TUONA

A koanbala taanli taa **jagiyenli** ke li tie ki guani ki bogini celi yaa tinmu ke bi tuuni mu niinni a tuona.

Guyenema n taa balimaama n°008-2023/ALT li binli 2023 ciluoba o dana 20, ki mi tuugi leni ti diema Bulicina Faso diedi maama tuona sanbila, bi den kaani yaa cagili n baa kpaagi ki biigi ki bandi yaaba n tuuni ti diedi maama tuona ki tie bonceli danba n pia yaa pana. Li baa todi ban diidi ki le a tuona n cuoni maama mi balimakpelima nni.

Laa cagili mia ban guani ki bogini kaani 127 yaaba n tuuni ti diedi maama tuonli po ke bi coali tie 49.

II. I LAABAALITENKE

II.1. Yaa koanbali n die i laabaali, leni ku maasuagu, leni yanluadi goada tuona puni a Koanbala Taanli u laabaalu ke u tuugi leni Bulicina Faso gedima li ɲanduli ni buoli kuli taanma Cagicianli u cogu, mi banma leni ku maasuagu po (INESIKO) n bogini yaa taanli mi piinaa n taabualuobima (46) po li ɲandunli piama sanbila nni li binli 2024, cilee o 31 daali Niwu Deli Endu diema nni.

Bulicina Faso tuoma yaa balimaama n koa leni li ɲanduli niba leni ku tingbangu piama gubima, doagidi ke mi ti diema tie li a niali li ɲanduli yema ɲamu po leni o nisaalo yema sanbila ñoadi po. Ti diema gedima mi piinaa n taabualuobima (46) taanli yaali n tiena baa fidi ki teni ti diema maasuagu kaannaalu (**Tiebele Badidiegu**) n taani li ɲandunli piama coali nni.

II.2. Yaa koanbali n diidi ti diema tinbuona, komininba gobidima tuona leni li guunli puni a Koanbala Taanli yaa laabaalu n tuugi leni ban den bogini ke bi baa coadi ki pa komininba tuonsoanba yaaba n gaa bi fuodima ɲmaligi leni yaaba n gaani mi todima ligi maama.

Laa ligipama po den teni ke a ligipala den tagini mi diema komininba nni li binli 2023 ki cili ciyia ki ban pundi piigincilie. Yaali n tugi li yuli laa ligi coaditenma po den tie ki bandi yaa niba n gaani i ligi merinba nni kuli ya ye likani, lani n tie yaaba n gaani bi fuodima ligi, ban guani ki tiadi ki pa yaaba bi ɲmapani ligi, a cienbila n gaani yaa ligi, ki go bandi kominni tuonsoanba yaaba n gaa mi fuodima n pia yaa paga. Yaa resioninba n ye leni ti yanyagidi boncianla den soani bi tila a ligitenla kani.

Laa ñama den teni ke bonli bonciala fidi ki tieni, nani :

- ki diani yaaba n gaani mi todima ligi resionni kuli nni;
- ki la ke tianba den gaani yaa ligitodike n cie ban bi baa gaani maama moamoani po;

- ki la ke tianba mo gaani yaa ligitodike n naa pundi ban bi baa gaani maama moamoani po;
- Ki bandi ke nitianba yaaba n gaani i ligitodike kpe ama ke bi naa waani i ligitodike tuonsoandiedi nni.

Moko laa ligitenma komininba nni teni ke bi fidi ki baa guani ki teni i ligitodike n ɲoadi li fuuli nani li balimaama n bili maama ki go baa i ligitodike ɲoadima fuuli ñiali leni yaaba n gaani i ligitodike komininba nni yela tigbanyengu nni ki nan fidi ki kuani bi kuli yaa tuonsoanba n gaa mi fuodima ligibuabuali ban yii yaali KARIFO po.

II.3. Yaa koanbali n die ti diema leni dietoama siiga tuginma tuona leni ti diema niba yaaba n ye dietoama nni maama puni a Koanbala Taanli **laabaalita (03)**.

U **cicilaabaalu (01)** tuugi leni Sayeli diema taajuogu cagili ban yi yaali AYESI dietaadima Badiba taanli yaali n den tieni li binli 2024, cilele dana 6 daali Ñame dogu nni, Niseri diema nnni togida.

Laa taanli mayuli cianli den tie ki pugini u taajuogu mi dietaadima yeni nni (lani n tie Mali, Bulicina Faso leni Niseri) leni “Sayeli diema tuginyenma” bogida cilima.

Laa taanli yogunu, ti diema Yudanciamo, Kapiteni Ibirayima TARAWORE leni o Yudanlieba Koloneli Asimi GOYITA, leni Senerali Abiduramani CIANI den taani ki ñii yaa sieditili n doagidi ke « Sayeli diema tuginyenma » cili.

Laa sieditili ñiima doagidi ke bani AYESI baditietaadiba yeni li tuo moamoane ke bi baa yaa ɲoa bi diema niba n bua yaa sanu ki go taani ki yaa tuuni yaali n tie bi kuli nunmoani tuona.

Laa taanli nni, AYESI diema Yudancianba den gandi Koloneli Asimi GOYITA, Mali diema Yudanciamo, n tua Sayeli diema tuginyema cagili Yundanciamo ki baa

gobidi li cagily yeni binli po ke Bulicina Faso mo n baa kaani mi dietaadima yeni tunginyenma depiteenba cicitaanli. Bi go taani ki yedi ke bi baa cilini diemita yeni tunginyenma ligibuabuali ki go yaa biliti yaa ligi n baa teni AYESI tingbangu nni n yaa pia mi yanduanma.

U laabaalilielu (02) tuugi leni ti diema Cicikoanbali n den gedi ki ba fuondi a moala diema Iran li tuonli leni ku dalingu yeli po li binli 2024, cinaa o 24 daali ṅali ki ban pundi cimuu, o danyenli daali.

Laa fuondi mayuli den tie ki pugini Bulicina Faso leni Iran diema taayema tuona. I fuondi yeni den daa ki tugini leni Afirika leni Iran loagu taancianli mi taabualiliema po leni Iran piana doagidima mi taabualiluobima po.

Ti diema Cicikoanbali Apolineri Joasim KIELEMI de Tanbila yienu Irani diama nni den teni ke o baa ki goandi lipo mi tagigima tuonsoandiedi kuuran leni li guunli sanbila nni. Laa danlifuondi den teni ke Iran diema liigi yaaba bandi Bulicina Faso loagu bonmoanla ki go teni ke bi doagidi bi suginmoanma ki baa todi ti diema n koani ki paadi ti yanyagidi. Laa fuondi go kaani li kpaagili yaala n tie Eri Irani biakasanu luodima leni visa tili bolinma Bulicina Faso leni Irani diema siiga. Iran diema liigiyaaba go den waani ke bi baa todi ti diema leni mi banma tiadi leni a tuontaana sanbila bangima.

Ti diema Cicikoanbali yienu Irani diama nni go den teni ke o fidi ki kali leni Bulina Faso niba yaa n ye Irani diema nni. Bi bogili yogunu, Bulicina Faso niba yaaba n ye Iran diema nni den pagi ti diema liigiyaaba leni bi moandili mi yepaama koanli po ki go waani ke bi ye leni mi diema laa koanli nni.

U laabaalitaaluu (03) tuugi leni Bulicina Faso gedima Sandini niba fiima bi yema lebidima po daali badu mi piina n taabualimuudima (45) po, li binli 2024, cilele ṅmaalo, o 19 daali Managua, Nikaragua diema nni.

Ti diema gedima laa badu po baa pugini ku dalingu leni u taajuogu ŋamu Bulicina Faso leni Nikaragua diema siiga.

II.4. Yaa koanbali n diidi mi tagima tuonsoandiedi findima, u kpendu tuona leni u nuu tuonsoanbanma puni a Koanbala Taanli **laabaalilie (02)**

U **cicilabaalu** tuugi leni Bulicina Faso gedima Kameruni diema nuubontagikaala tuona kpendu badu li ŋandunli kuli po (SIARIKI) mi taabualiniima (08) po, li binli 2024, cilele ŋmaalo ki cili o 22 daali ki ban gbeni o 31 daali Yawunde dogu nni.

Laa badu mayuli tie:” **a masina bandima n kpendinni mi findimoanma u nuubontagikaala tuona nni leni u taayienu u nuubontagikaala tuonsoanba siiga”.**

Kameruni diema nuubontagikaala kpendu badu li ŋandunli kuli po, SIARIKI yeni tie naankani ke Afirika nuubontagikaala tuonsoanba baa doagidi bi banma ki go teni yua kuli n bandi o lielo ki go baa mi tuginma leni a bondaamoana lan luodi bi kpendu sani.

U **laabaalilielu (02)** tuugi leni ki yaa di ti yaaba n tagi yaala badu ŋmaalo bogida mi taabualimuudima po Afidika nintuali tingbangu diema loagu leni i ligi taanma (I YEMOYA) nni, li binli 2024, pigincilo o 07 daali.

Yaa diema n ye IYEMOYA cagili yeni nni leni li cagili liigi yaaba n ñani yaa mayuli laa badu mi taabualimuudima po n tiena : **“ki yaa di tin tagi tiba yaala lani n tie IYEMOYA findima benñiali mi tagima, u kpendu leni u loagu piakaala sanbila nni”**

Laa badu boginma bua ki teni cipiiga ŋmaalo n tua yaa yogunu ke yua kuli baa tieni ania ki yaa di tinba ti yaaba n tagi yaa jiema leni yaa bonjekaala n ñani IYEMOYA diema tingbangu nni.

Laa badu bogida baa taani leni ti diema Bulicina n ñani yaa dana bi niba yankuamoanli leni bi buamoanma mi diema tuona po.

II.5. Yaa koanbali n diidi ku gbanansaagu jeliti tuona, leni bi nipanba leni a tuona maama togidi a Koanbala Taanli Bulicina Faso n den gedi Afirika gbanansaagu jeliti mi nuama sanbila nni li binli 2024, ciluoba o 21 daali ki ban tuoni o 26 daali Duala, Kameruni diema po.

Laa gbanansaagu jeliti den taani Afirika nni niba 2 500 yaaba n sani ki kua bi lieba liiga, yaaba n den gedi ti diema yeli po den baa wula laanu yendu ki yugi ki ci taalimata jeligu nni leni alinjifa laanu a bonpola yugiciima sololo jeligu nni. Li yaa po teni ke ti diema tua mi piiga n dienaalima (14) piinaa n diemayia(49) siiga yaama n taani laa jeliti po.

A Koanbala Taanli jaandi yaaba n baa i laani ti jeliti yeni po kuli leni bi moandili ki go miadi ban pugini li a niali yaa gbannansaajeliti n kpendi po.

III. BAN DINI YAABA A BALA

Tinunga 15 bonmu 20 nni

III.1. YAABA N BAA LI BALI TUONCELI PO

A. BULICINA FASO BADIDIECIANGU KANI

- Asani **TANBURA**, o lanba li tuonli nni tie **75 670 P**, ki tie laa koanbadiegu tuonsoangbengili, o dini li bali ki tie Bulicina Faso Saliwuudi tondo Koweti diema nni ;
- Yakuba **BILA**, o lanba li tuonli nni tie **212 301 W**, ki tie u loagu (mi piama) tuona tundikoa, dini li bali ki tua canbaa, yaa tuonjaali n moa mi niyoma tuona findima (APEKI) yudancianmo tuonli kani ;
- Boroma **TALIWALI**, o lanba li tuonli nni tie **49 124 L**, ki tie a luba goandikoa, dini li bali ki tua mu tinmu boginma (AYENSEYEFI) gobidikoa liiga yua;
- Felikisi Sadili **DALA**, o lanba li tuonli nni tie **212 272 V**, ki tie a tinbuona boginma tundikoa, dini li bali ki tua mu tinmu tuona bandima leni mu paka liiga yua.

B- YAA KOANBADIEGU N DIE TI DIEMA GUUDIMA TUONA LENI A MINTEELIKPELA MAAMA

- Isimayeli **NAMOANO**, ki tie minteeligbeeli, dini li bali ki tua mi niyoma gobidima leni u boginma yaa tuonsoanjaali n kpaagi laa koanbadiegu tuona po (SENESI) liiga yua.

C- YAA KOANBADIEGU N DIE TI BUUDI LENI O NISAALO N PIA YAA SANBILA TUONA, KI TUUGI LENI A TUONSOANJAANA

- Madiseli **SONGO**, o lanba li tuonli nni tie **212 340 G**, ki tie o nisaalo n pia yaa sanbila tundikoa, dini li bali ki tua o nisaalo n pia yaa sanbila Yudanciamo;
- Emilli Fideli konatie **DALA**, o lanba li tuonli nni tie **130 430 U**, ki tie juju (bujialo), dini li bali ki tua ku bubuudidiegu ligitodima (FAJI) yudanciamo;

- Isa Abiduli-Jabari Suuri **MAYIGA**, o lanba li tuonli nni tie **130 299 R**, ki tie juju (bujialo), dini li bali ki tua Yudanciamo ki baa yaa gobidi ban cuo bi ki gaa yaa ligi bi yaa tiadi, ke laa tuonjaali yi ANAGIRASIKI ;
- Diedone **BONKUNGOU**, o lanba li tuonli nni tie **130 382 D**, ki tie juju (bujialo), dini li bali ki tua ku buudidiegu liiga yua.

D- YAA KOANBADIEGU N DIIDI ENTERINETI LENI A TISOANKAANA TUONSOANDIEDI LENI TELEFONNI TUONA

- Tegi-Wende Idirisi **TINTO**, o lanba li tuonli nni tie **255 514 L**, ki tie i laabaali boginma tuona bandiciamo, dini li bali ki tua li koanbali Tundikoa.

E. YAA KOANBADIEGU N DIIDI MI TAGIMA TUONSOANDIEDI FINDIMA, U KPENDU TUONA LENI U NUU TUONSOANBANMA

- Eduwari **KABORE**, o lanba li tuonli nni tie **247 184 L**, ki tie u loagu tuona tundikoa, dini li bali ki tua li koanbali todikoa.

F. GUVENEMA LENI A KOANBALA TAANLI TILA DIANMA TUONSOANDIECIANGU

- Sisilen **MILOGO**, o lanba li tuonli nni tie **245 174 C**, ki tie i ligi tuonsoanjaana gobidikoa, dini li bali ki tua baalo tuona daamu liiga yua.

III.2. BAN DINI YAABA A BALA A TUONJAANA YELI PO

A Koanbala Taanli baa ban dini yaaba a bala ke bi tua Gobidikaaba yaa tuonjaana n nua ne nni :

- SIDIWAYA leni Bulicina Dajo leni tele tuonsoandiedi kani yaa koanbadiegu n die i laabaali leni ku maasuagu, leni yanluadi goada tuona ;
- Yaa tuonjaali n moa mi diema tuonsoanbanma findima (APEN), yaa koanbadiegu n diidi mi tagima tuonsoandiedi findima, u kpendu tuona leni u nuu tuonsoanbanma kani.

A koanbala dini yaa tuonjaali n bogindi mi diema tuonsoanbanma findima (APEN) yudaano.

**A. YAA KOANBADIEGU N DIE I LAABAALI LENI KU MAASUAGU,
LENI YANLUADI GOADA TUONA**

A Koanbala Taanli taa **jagalie (02)**.

Li jagikpiali dini Bakari **KONE**, o lanba li tuonli nni tie **117 403 C**, ki tie laabaalitenli bando, o tua baalo tondo a tuona gobidima po, yaa koanbadiegu n die i laabaali leni ku maasuagu, leni yanluadi goada tuona ki tugini leni **SIDWAYA** tuonboginma kani binaa taa (03) po.

Li jagilieli dini Buleema **LANKOANDE**, o lanba li tuonli nni tie **111 394 F**, ki tie laabaalitenli bando, o tua baalo tondo a tuona gobidima po, o yudanciamo koanbadidiegu yeli po, Bulicina Dajo leni tele tuonsoandiegu kani binaa taa (03) po.

**B. YAA KOANBADIEGU N DIIDI MI TAGIMA TUONSOANDIEDI
FINDIMA, U KPENDU TUONA LENI U NUU TUONSOANBANMA
KANI**

A Koanbala Taanli taa **jagalie (02)**.

Li jagikpiali dini Manbila **BAANSE**, o lanba li tuonli nni tie **96 516 D**, ki tie u loagu tuona tundikoa, o tua baalo tondo a tuona gobidima po, yaa koanbadiegu n diidi mi tagima tuonsoandiedi findima, u kpendu tuona leni u nuu tuonsoanbanma yeli po, yaa tuonjaali n bogindi mi diema tuonbanma findima (APEN) kani bina taa (03) po.

Li jagilieli dini Manbila **BAANSE**, o lanba li tuonli nni tie **96 516 D**, ki tie u loagu tuona tundikoa, o tua yaa tuonjaali n bogindi mi diema tuonbanma findima (APEN) tuona gobidima cagili liigiyua bina taa (03) po.



www.sig.gov.bf

Gouvernement
Le Porte-parole du Gouvernement,



Rimtalba Jean Emmanuel OUEDRAOGO

Officier de l'Ordre de l'Étalon

Rimitaliba Jan Emanuweli WEDARAWOGO

O baa Baalo jaandi leni Tanjoa maalima

Tinunga 20 bonmu 20 nni